

**Kommunit Namminersorlutillo Oqartussat
missingersuutaat naatsorsuutaallu pillugit
Inatsisartut Inatsisaata allanngortinnejarnissaa
pillugu Inatsisartut inatsisaat
(Piffissaq ungasinnerusoq eqqarsaatigalugu
aninggaasaliissuteqarnissamut
Aningaasaateqarfimmut isertitassanut tunngavissat
annertusineqarnerat, innersuussutip
naqqiissuteqarfigineqarnera, pisortat
ataatsimoorussamik IT atorlugu aaqqissuussinerat
aamma missingersuuitit oqimaaqatigiinnerat pillugu
§§ 2-5-imik atorunnaarsitsigallartarneq)**

§ 1

Kommunit Namminersorlutillo Oqartussat missingersuutaat naatsorsuutaallu pillugit Inatsisartut Inatsisaanni nr. 26, 28. november 2016-imeersumi makkua allanngortinnejarpuit:

1. § 18, imm. 3 aamma 4, imatut oqaasertalerneqarput:

”*Imm. 3. Aningaasaateqarfimmut akiliutit nuunneqartassapput immikkut ittumik isertitanit ukunannga:*

- 1) Ingerlatseqatigiiffiit nunanit allaneersut aatsitassarsiornermi misissuinerannut sanaartornerannullu atatillugu ingerlatseqatigiiffiup akileraarutaanit 30 mio. kr.-nik amerlanerusunit Nunatta Karsiata iluanaarutaanit pissarsiat,
- 2) Aningaasarsianit akileraarutit pillugit Inatsisartut Inatsisaanni § 72 a aamma § 72 b naapertorlugit akileraarutit A-t.

3) Namminersorlutik Oqartussat pigisaannik 50 mio. kr.-t sinnerlugit nalilinnik tunisaqarnermit iluanaarutit.

4) Soraarnerussutisiassanik imaluunniit inuunermut sillimmasiisimanernik Danmarkimi, Savalimmuni nunaniluunniit allani soraarnerussutisiassanut aninggaasaateqarfinnut nuussinernit imaluunniit inuunermik imaluunniit soraarnerussutisiassanut sillimmasiisarfimmit Kalaallit Nunaanni najugaqartumit akileraarutinit akitsuutinillu iluanaarutit.

5) Ingerlatsineq, sanaartorneq aamma taarsigassarsitsineq pillugit nunap karsiata naatsorsuutaanni sinneqartoortit.

Imm. 4. Iluanaarutit imm. 3, nr. 1-4-imi taaneqartut, tiguneqarnerisa kingorna piaartumik aningasaateqarfimmut nuunneqassapput. Sinneqartoortit imm. 3. nr. 5-imi taaneqartut, Inatsisartut nunap karsiani naatsorsuutinik akuersissuteqareernerisa kingorna piaartumik aningasaateqarfimmut nuunneqassapput.”

2. § 23, imm. 1, imatut oqaasertalerneqarput:

” **§ 23.** Ukiuumoortumik missingersuutini naatsorsuutit kommunalbestyrelsip ukiumoortumik naatsorsuutinik akuersissuteqarnermini aningaasaliissuteqarfissanut tunngatillugit isummerfigisai § 21, imm. 4 naapertorlugu kommunip ingerlatsineranut pisussaaffiliipput.”

3. § 32-imi imm. 3-tut ilanngunneqarpoq:

” *Imm. 3. Inatsisartunut qinersinerup malitsigisaanik upernaakkut ataatsimiittoqanngippat, imm. 1-imi taaneqartoq nalunaarusiaq, Kalaallit Nunaanni maannakkut aningaasaqarnikkut inissisimaneq pillugu Inatsisartunut allakkatigut ilisimatissuteqarnermik, taarserniarlugu Naalakkersuisut aalajangersinnaapput.”*

4. § 46 kingorna kapitalitut ilanngunneqarpoq:

” Kapitali 7 a

Pisortani ataatsimoorussaq IT pillugu suleqatigiinneq”

5. § 46-ip kingorna kapitali 7 a-mi ilanngunneqarpoq:

” **§ 46 a.** Naalakkersuisut makkua pillugit maleruagassanik aalajangersaasinnaapput:

1) Kommunit aamma Namminersorlutik Oqartussat ataatsimoorlutik IT atorlugu periaatsimik pisortani ataatsimoorussamik pissarsinissamut, ingerlatsinermut ineriaortitsinermullu aaqqissuussaanermik pilersitsissasut. Naalakkersuisut tassunga ilanngullugu aaqqissuussaaneq qanoq siulersorneqassanersoq, IT atorlugu periaatsit pisortani ataatsimoorussatut isigineqartariaqarnerannut tunngavissarititaasut suusanersut, aaqqissuussaanermi aningaasartuutit kommunit aamma Namminersorlutik Oqartussat akornanni agguardeqassanersut, aaqqissuussaanermi kommunit aamma namminersorlutik Oqartussat saniatigut allat sullillugit suliassanik suliaqartoqarsinnaanersoq il.il., maleruagassanik aalajangersaasinnaapput.

2) Naalakkersuisut aammattaaq aalajangersinnaavaat, kommunit aamma Namminersorlutik Oqartussat IT atorlugu periaatsit pisortani ataatsimoorussat suut atussaneraat.”

Imm. 2. Naalakkersuisut kommunit aamma Namminersorlutik Oqartussat erseqqinnerusumik aalajangikkatut annertussusilimmik paassisuttisanut nalunaarsukkanut akisussaaffik aaqqissuussaanernut imm. 1-imi taaneqartunut suliakkiunneqassasoq, Naalakkersuisut aalajangersinnaavaat.”

6. § 49-ip kingorna § 50-itut ilanngunneqarpoq:

” **§ 50.** §§ 2-5-imi aalajangersakkat piffissami 1. januar 2019 - 31. december 2021 atutissanngillat, taamaattoq takuuk imm. 2.

Imm. 2. Naalakkersuisut nalunaarummi piffissaq atorunnaarsitsiviusussaq imm. 1-imiiuttoq sivikillisissinnaavaat.”

§ 2

Inatsisartut inatsisaat ulloq 1. januar 2019 atuutilerpoq.

Namminersorlutik Oqartussat, ulloq 28. november 2018

Kim Kielsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut